

МАСЪУЛ РАҲБАРЛАР ҲИСОБОТ БЕРДИЛАР

Бугун, 10 март куни олтинчи чақириқ Ҳалқ депутатлари Фурқат тумани Кенгашининг учинчи сессияси бўлиб ўтди.

Туман ҳокими, Кенгаш раиси Дилмуроджон Солиев раислигида ўтган сессия ишида вилоят ҳамда туман Кенгаси депутатлари, туман Ҳалқ қабулхонаси мудири, туман прокурори, Ички ишлар бўлими бошлиғи, туман Давлат солик инспекцияси бошлиғи, туман ҳокимининг ўринбосарлари, туман ҳокимлиги гурух, бўлим раҳбарлари, тегишли туман ташкилотлари раҳбарлари, сектор аъзолари ҳамда оммавий ахборот воситалари вакиллари қатнашилар. Шунингдек, сессияда вилоят давлат солик бошқармаси бўлим бошлиғи Сойибжон Сиддиқов иштирок этди.

Сессия кун тартибидиги 1-масала Фурқат туманида 2020 йилда Ёшлар бандлигини таъминлаш юзасидан секторлар фаолияти тўғрисида туман ҳокими,

1-сектор раҳбари Дилмуроджон Солиев, туман прокурори, 2-сектор раҳбари Санжарбек Аминжонов, туман ИИБ бошлиғи, 3-сектор раҳбари Баҳодиржон Калонов, туман Давлат солик инспекцияси бошлиғи, 4-сектор раҳбари Қобулжон Абдуллаевларнинг ҳисоботлари тингланди.

Сектор раҳбарларининг ҳисоботлари юзасидан қабул қилинган қарорга асосан 2020 йилда Фурқат туманида ёшлар бандлигини таъминлаш бўйича “Йўл харитаси”, ишсиз ёшлар бандлигини таъминлаш бўйича Манзилли режа, Фурқат тумани ҳудудидаги бошқарма, идора, ташкилот ва хўжалик бошқаруви органлари томонидан 2020 йилда ишсиз ёшлар (18-30 ёш) бандлигини таъминлаш режаси, Фурқат туманида 2020 йилда ишсиз ёшлар бандлигини таъминлаш бўйича амалга ошириладиган чора-тадбирлар мониторингини олиб борувчи ишчи гуруҳи таркиби, Ёшлар бандлигини таъминлаш дастурини амалга ошириш схемаси тасдиқланди.

Сессияда Ўзбекистон Республикаси Президентининг Фурқат тумани Ҳалқ қабулхонаси мудири Р.Жўраев 2019 йил давомида ҳудудларни комплекс ижтимоий-иқтисодий ривожлантириш бўйича секторлар ва мутасадди идора ва ташкилот раҳбарлари фаолияти ва мурожаатлар билан ишлашнинг ҳолати юзасидан ҳамда Фурқат туманида 2020 йилда ёшларга оид давлат сиёсатини амалга ошириш, уларни иш билан бандлигини таъминлаш, касб-ҳунарга йўналтириш, тадбиркорлик, фермерлик, хунармандчилик фаолиятига жалб этиш тўғрисида ахборот берди.

Ахборот юзасидан қабул қилинган қарорда мурожаатлар билан ишлашда етарли даражада иш ташкилламаган, қонун талаблари бузилишига йўл қўйган ташкилот раҳбарлари навбатдаги сессияларда ҳисобот беришлари белгилаб қўйилди.

Бугунги сессияда ноодатий масала ҳам муҳокама қилинди. “Менинг юртим” телеканалининг “Марказий студия” дастури орқали эфирга берилган Фурқат тумани Марказий шифохонаси туғруқхона бўлими фаолиятига оид танқидий видеолавҳа намойиш этилиб, ушбу ҳолат ҳамда туман Тиббиёт бирлашмасида туғилиш ва болалар ўлими кўрсаткичлари тўғрисида Тиббиёт бирлашмаси масъул ходимлари О. Сайдаҳмедов ва М.Тўлабоевларнинг ҳисоботлари тингланди.

Бу масала депутатлар ўртасида қизғин мунозараларга сабаб бўлди. Тиббиёт соҳасига етарли маблағ ажратилган, тиббиёт муассасалари замонавий ускуна ва анжомлар билан таъминланган бўлсада, гўдаклар ўлими 2019 йилда 33 та ҳолатда қайд этилгани (2018 йилда 18 та) асосий танқидларга сабаб бўлди.

Қабул қилинган қарорда туғруқхона бўлими мутахассисларининг билими ва тажрибаси етарли эмаслиги кўрсатиб ўтилиб, бўлимни, умуман тиббиёт муассасаларини малакали кадрлар билан таъминлаш, уларнинг билим ва малакасини ошириш, соҳада коррупция ҳолатларига йўл қўймаслик бўйича аниқ вазифалар белгиланди.

Сессия якунида туман ҳокими, Кенгаш раиси Д. Солиев сўзга чиқиб, Ҳалқ депутатлари туман Кенгашининг мавқейини ва ўрнини юксалтириш, депутатлар фаоллигини ошириш, соҳалардаги муаммоларни навбатдаги сессияларда муҳокама қилиб бориш юзасидан таклиф ва мулоҳазаларини билдириди.

Қабул қилинган қарорлар ижрочи масъулларга юборилиши белгиланиб, бажарилиши назоратга олинди.

2020-03-11 09:39:47